

Un libri scrit di **Novella Del Fabbro** e **Gigliola Di Piazza** al conte origjins e storie di chest avôt su lis monts che al dure di cinccent agns.

» DI **CHRISTIAN ROMANINI**

Cjaminâ par oris e oris, partint di For di Avoltri inmò prime dal cricâ dal di. Fadiâ, ma cence rindisi dal dut cont, judâs dal preâ e dal cjantâ daûr de tradizion de Val di Guart. Rinovâ an daûr an chê tradizion che di secui la int de Cjargne e dal Cjadovri e puarte indevant lant a pît fint al santuari di Maria Luggau, o a Madone di Lucau, te val dal Gail in Carinzie, intune esperience di fede e di popul. "Voci di pellegrini a Maria Luggau" al conte dut chest propit cu la vôs di chei che le àn vivude.

DE CJARGNE AE CARINZIE

La publicazion, finide di stampâ dal Jugn dal 2014, e je firmade di **Novella Del Fabbro** e **Gigliola Di Piazza** che a àn curât tescj e fotografiis. Cun prefazion di pre **Pierluigi Di Piazza**, il libri si vierç cuntune ricercje storiche di **Marina Di Ronco** che e riclame lis origjins e la storie di chest avôt. Ma l'aspjet originâl di chestis pagjinis e je propit la vôs dai tancj pelegriins che a àn fat chel troi tal bosc, passant pai monts che, cualchidun al disarès, "a dividin", ma a nô nus somee plui just scrivi "a unissin" la nestre int a cjeval di un confin che di fat nol è nancje segnât dilunc dal percors. Esperience contade a scomençâ di **Pietro Fontani**, vuê president de Provincie di Udin, ma tal 1985 pelegrin



Pelegriins
ae volte
di Maria
Luggau

Vôs di pelegriins cence confins

cu la sò morose, vuê sò femine, Viviana "A diviers agns de mè esperience, o ricuardi ancjemò lis sensazions di chê cjaminade particolâr: il paisaç, lis melodiis, la fede che mi à sburtât a sperimentâ chel troi, a àn rindût chel moment speciâl e unic".

ANTIGHIS TESTEMONEANCIS

A son lis peraulis dai pelegriins di îr: pre **Mattia Pasqualis**, predi dal Sietcent, che sul so diari al à fissade une des testimonianciss plui antighis di cheste tradizion; pre **Fortunato Candido** plevan di For di Avoltri dal 1903 al 1919; pari Albino Maria Candido che al testimonee il so ricuart dal 1985 tal "Diario di un pellegrino

carnico". E al è pre **Antoni Beline** che al à metût adun une preiere une vore sintude, cognossude traviers i ricuarts de none di Sostâs: come che si lei tal coment introdutîf "il test al è probabilmèntri dai agns Setante, ma lis peraulis di pre Antoni, cussì veris e lancurosiss, a son inmò di grande atualitât".

E po a son lis testimonianciss dai pelegriins di vuê: paris, maris, fîs e fiis che a insiorin chestis pagjinis cun ricuarts che a travanin dal savôr genuin de vite di ogni dì e che a invidin ancje cui che nol è inmò stât, a cjapâ un doman chel troi che al mène fint a Madone di Lucau.

✉ ilfriuli@ilfriuli.it

CONCORS

Pôcs dîs par presentâ i tescj cinematografics

Al scjât vinars ai 12 di Setembar il tiermin pe presentazion des oparis pe edizion numar 10 dal Concors par tescj cinematografics in lenghe furlane, promovût e organizât ogni doi agns di bande dal Centri Espressions Cinematografichis cul contribût de Agenzie Regionâl pe lenghe furlane, de Provincie di Udin e dal Comun di Udin.

Il regolament al previôt 4 sezions competitivis: senegaduris (premi di 1500 euros), articui di critiche ai films de mostre dal cine 2013 (premi di 400 euros), saçs (premi di 250 euros) e sogjets cinematografics (premi di 250 euros).

Lis oparis premiadis e segnaladis a saran publicadis su la riviste di cine 'Segnâi di lûs'. La premiazion e sarà li dal Visionario a Udin intune serade speciâl tal prossim mê di Dicembar.

Par viodi il bant e domandâ informazions si pues visitâ il sît www.mostredalcine.org o contatâ: 0432.299545 - fabiano@cecudine.org.

SCOLTADIS DI DRIUS

Pomade speciâl

In speziarie: "Ch'al mi dei par plasè che pomade che uarîs el Irpef".



Euronews informa

La Provincie e vote un ordin dal dì par riabilitâ la memorie dai alpins injustementri condanâts a muart sul pas di Mont di Crôs

Riabilitâ la memorie dai alpins apartignints Rae 109^a compagnie M. Arvenis, injustementri condanâts e copâts dongje il pas di Mont di Crôs, in Cjargne, il 1° di Lui dal 1916. Par chest il Consei provinciâl al à fat bon un ordin dal dì presentât dai conseîrs cjâfs grup Renato Carlantoni (FI), Mauro Bordin (Lega Nord) e Stefano Marmai (Udc). Cu la aprovazion dal ordin dal dì, il president de Provincie Pietro Fontanini si è impegnât a dâsi dongje a la richieste e a puartâ indevant, in dutis lis sedis oportunis, lis iniziativis inviadis o di inviâ de bande dai Comuns interessâts, indreçadis a comedâ la veretât storiche dai cuatri alpins che a àn vût la imagine ofindude di une vore di timp, e tornâ a dâ un pôc di pâs tal cûr di duçj chei che a àn patût injustementri par chesj muarts.



Come che o vin dît, i fats a van indaûr a la Prime Vuere Mondiâl, cuant che cuatri alpins - Gaetano Silvio di Ortis di Paluce, Basilio Matiz di Paluce, Giovanni Battista Coradazzi di For Disore, Angelo Primo Massaro di Manià - a forin fusilâts dopo un procès fat a la svelte. Daûr des testimonianciss il procès di condane a muart al fo imbastît in mut scorec. Cun di plui al è stât verificât che i alpins a jerin dal dut estranis ai fats contestâts. Come che al è vignût fûr des indagjinis storichis-archivistichis seguitivis, e fo fate une injuste condane. Ai zovins al fo contestât il reât di rivolte e no chel plui aderent ai fats di amotinament. I cuatri, in fat, a refudarin di esegûi un ordin assurt, giudicât di duçj, seguitivementri, cence sens e che al varès puartât a gnûfs maçalizis.

Par chest tal 1997 il Comun di Paluce al veve fate buine une mozion dulâ che si domandave al President de Republiche la riabilitazion postume dai alpins. Tal 2000 la Comission Difese dal Senât e à anzunziât la revision dal procès. Nomenâts esponents de montagne come il giornalista Paolo Rumiz, il storic Andrea Zuliani e il scritôr Mauro Corona, di resint, a àn domandât di cjapâ une posicion clare su la cuistion. Un mê indaûr il sindic di Fors Disore, Lino Anziutti, al à inviât une letare al President de Republiche. Par chest la Assemblee provinciâl e à decidût di dâsi dongje inte richieste corâl di riabilitazion postume, par tornâ a dâ dignitât ai alpins copâts dai propriis coleghis e soredut comedâ une situazion di serie injustizie fate ai dams des fameis dai cjadûts.